



ГАРЧИГ

МОНГОЛ УЛСЫН ХУУЛЬ

- | | | | |
|------|--|--|------|
| 216. | Нэмэгдсэн өртгийн албан татвараас чөлөөлөх тухай | | 1002 |
|------|--|--|------|

МОНГОЛ УЛСЫН ИХ ХУРЛЫН ТОГТООЛ

- | | | | |
|------|---|-----------|------|
| 217. | Тогтоолын хавсралтад нэмэлт оруулах тухай | Дугаар 40 | 1002 |
| 218. | Төрийн өндөр албан тушаалтны зэрэг зиндаа, түүнтэй адилтгах төрийн албан тушаалтны зэрэглэлийг шинэчлэн тогтоох тухай тогтоолын хавсралтад нэмэлт оруулах тухай | Дугаар 42 | 1003 |
| 219. | Монгол Улсын Элчин сайдын яам, Ерөнхий консулын газар, Консулын газрыг гадаадын зарим улсад нээх, сэргээн ажиллуулах тухай | Дугаар 43 | 1004 |
| 220. | “Импортын барааны гаалийн албан татварын хувь, хэмжээ батлах тухай” тогтоолын хавсралтад нэмэлт оруулах тухай | Дугаар 44 | 1004 |

МОНГОЛ УЛСЫН ЕРӨНХИЙЛӨГЧИЙН ЗАРЛИГ

- | | | | |
|------|--|-----------|------|
| 221. | Шүүхийн ёс зүйн хорооны гишүүнээр томилох тухай | Дугаар 83 | 1006 |
| 222. | Элчин сайдыг тохоон томилох тухай | Дугаар 86 | 1006 |
| 223. | Элчин сайдыг эгүүлэн татах, тохоон томилох тухай | Дугаар 87 | 1007 |

МОНГОЛ УЛСЫН ЗАСГИЙН ГАЗРЫН ТОГТООЛ

- | | | | |
|------|-----------------------------|------------|------|
| 224. | Журам батлах тухай | Дугаар 93 | 1007 |
| 225. | Журам шинэчлэн батлах тухай | Дугаар 105 | 1017 |



МОНГОЛ УЛСЫН ХУУЛЬ

2013 оны 06 дугаар
сарын 07-ны өдөр

Улаанбаатар
хот

НЭМЭГДСЭН ӨРТГИЙН АЛБАН ТАТВАРААС ЧӨЛӨӨЛӨХ ТУХАЙ

1 дүгээр зүйл. Үйлдвэрлэснээс хойш нэг хүртэл жилийн насжилттай, шинэ троллейбус, нийтийн зорчигч тээврийн үйлчилгээний стандартын шаардлага хангасан, 24 буюу түүнээс дээш суудалтай, 45 буюу түүнээс дээш зорчигчийн багтаамжтай, үйлдвэрлэснээс хойш нэг хүртэл жилийн насжилттай, шинэ автобусыг импортоор оруулахад нэмэгдсэн өртгийн албан татвараас тус тус чөлөөлсүгэй.

2 дугаар зүйл. Энэ хуулийг 2014 оны 01 дүгээр сарын 01-ний өдрөөс 2016 оны 12 дугаар сарын 31-ний өдөр хүртэлх хугацаанд дагаж мөрдөнө.

МОНГОЛ УЛСЫН
ИХ ХУРЛЫН ДАРГА

З.ЭНХБОЛД

МОНГОЛ УЛСЫН ИХ ХУРЛЫН ТОГТООЛ

2013 оны 05 дугаар
сарын 24-ний өдөр

Дугаар 40

Улаанбаатар
хот

Тогтоолын хавсралтад нэмэлт оруулах тухай

Гаалийн тариф, гаалийн татварын тухай хуулийн 4 дүгээр зүйлийн 4.3 дахь хэсгийг үндэслэн Монгол Улсын Их Хурлаас ТОГТООХ нь:

1. “Импортын барааны гаалийн албан татварын хувь, хэмжээ батлах тухай” Улсын Их Хурлын 1999 оны 6 дугаар сарын 03-ны өдрийн 27 дугаар тогтоолын хавсралтын 5 дугаар бүлэгт “05... Бусад газар заагдаагүй, мал, амьтны гаралтай бүтээгдэхүүн 5” гэсний дараа дор дурдсан агуулгатай 05.11 гэсэн зүйл нэмсүгэй:



“

		0511.10.00	Бухын үр	0
	05.11	0511.99.10	Үржлийн мал, амьтны үр (бухын үр орохгүй), ийлдэс	0
		0511.99.50	Малын хөврөл үр	0

“

2.Энэ тогтоолыг 2014 оны 01 дүгээр сарын 01-ний өдрөөс эхлэн 2016 оны 12 дугаар сарын 31-ний өдрийг хүртэл дагаж мөрдсүгэй.

**МОНГОЛ УЛСЫН
ИХ ХУРЛЫН ДАРГА**

З.ЭНХБОЛД

МОНГОЛ УЛСЫН ИХ ХУРЛЫН ТОГТООЛ

2013 оны 06 дугаар
сарын 06-ны өдөр

Дугаар 42

Улаанбаатар
хот

**Төрийн өндөр албан тушаалтны зэрэг зиндаа,
түүнтэй адилтгах төрийн албан тушаалтны
зэрэглэлийг шинэчлэн тогтоох тухай тогтоолын
хавсралтад нэмэлт оруулах тухай**

Төрийн албаны тухай хуулийн 5 дугаар зүйлийн 5.4 дэх хэсгийг үндэслэн Монгол Улсын Их Хурлаас ТОГТООХ нь:

1.Улсын Их Хурлын 2002 оны 11 дүгээр сарын 08-ны өдрийн 73 дугаар тогтоолын хавсралтаар баталсан “Төрийн өндөр албан тушаалтны зэрэг зиндаатай адилтгах төрийн албан тушаалтны зэрэглэл”-ийн адилтгах албан тушаалын зэрэглэл ТӨ-IVA-ийн захиргааны албан тушаалд “Шүүхийн ерөнхий зөвлөлийн дарга” гэж, адилтгах албан тушаалын зэрэглэл ТӨ-VA-ийн захиргааны албан тушаалд “Монгол Улсын Төрийн албаны зөвлөлийн дарга” гэсний дараа “Шүүхийн ерөнхий зөвлөлийн гишүүн” гэж тус тус нэмсүгэй.

2.Энэ тогтоолыг 2013 оны 6 дугаар сарын 06-ны өдрөөс эхлэн дагаж мөрдсүгэй.

**МОНГОЛ УЛСЫН
ИХ ХУРЛЫН ДАРГА**

З.ЭНХБОЛД



МОНГОЛ УЛСЫН ИХ ХУРЛЫН ТОГТООЛ

2013 оны 06 дугаар
сарын 07-ны өдөр

Дугаар 43

Улаанбаатар
хот

Монгол Улсын Элчин сайдын яам, Ерөнхий консулын газар, Консулын газрыг гадаадын зарим улсад нээх, сэргээн ажиллуулах тухай

Дипломат албаны тухай хуулийн 6 дугаар зүйлийн 6.4 дэх хэсэг, Монгол Улсын Их Хурлын чуулганы хуралдааны дэгийн тухай хуулийн 43¹ дүгээр зүйлийн 43^{1.3} дахь хэсгийг үндэслэн Монгол Улсын Их Хурлаас ТОГТООХ нь:

1.Монгол Улсаас Бүгд Найрамдах Индонези Улсын нийслэл Жакарта хот, Холбооны Бүгд Найрамдах Бразил Улсын нийслэл Бразилиа хотод Элчин сайдын яам тус тус нээн ажиллуулахаар тогтоосугай.

2.Монгол Улсаас Лалын Бүгд Найрамдах Афганистан Улсын нийслэл Кабул хотод Элчин сайдын яамны үйл ажиллагааг сэргээн ажиллуулахаар тогтоосугай.

3.Бүгд Найрамдах Түрк Улсын Истанбул хот, Бүгд Найрамдах Киргиз Улсын нийслэл Бишкек хотод Монгол Улсын Ерөнхий консулын газрыг тус тус нээн ажиллуулахаар тогтоосугай.

4.Бүгд Найрамдах Хятад Ард Улсын Хайлаар хот, Бүгд Найрамдах Солонгос Улсын Пусан хотод Монгол Улсын Консулын газрыг тус тус нээн ажиллуулахаар тогтоосугай.

**МОНГОЛ УЛСЫН
ИХ ХУРЛЫН ДАРГА**

З.ЭНХБОЛД

МОНГОЛ УЛСЫН ИХ ХУРЛЫН ТОГТООЛ

2013 оны 06 дугаар
сарын 07-ны өдөр

Дугаар 44

Улаанбаатар
хот

“Импортын барааны гаалийн албан татварын хувь, хэмжээ батлах тухай” тогтоолын хавсралтад нэмэлт оруулах тухай

Гаалийн тариф, гаалийн татварын тухай хуулийн 4 дүгээр зүйлийн 4.3 дахь хэсгийг үндэслэн Монгол Улсын Их Хурлаас ТОГТООХ нь:



1.“Импортын барааны гаалийн албан татварын хувь, хэмжээ батлах тухай” Улсын Их Хурлын 1999 оны 6 дугаар сарын 03-ны өдрийн 27 дугаар тогтоолын хавсралтын 87 дугаар бүлгийн Барааны бичиглэл “Төмөр зам буюу трамвайн замын хөдлөх бүрэлдэхүүнээс бусад тээврийн хэрэгсэл, тэдгээрийн эд анги, тоног хэрэгсэл”, Албан татварын хувь, хэмжээ “5” гэсний дараа дор дурдсан агуулгатай 87.02 гэсэн зүйл нэмсүгэй:

“

87.02	8702.10.21	Нийтийн зорчигч тээврийн үйлчилгээний стандартын шаардлага хангасан, 24 буюу түүнээс дээш суудалтай, 45 буюу түүнээс дээш зорчигчийн багтаамжтай, үйлдвэрлэснээс хойш нэг хүртэл жилийн насжилттай, шинэ автобус (дизель, хагас дизель хөдөлгүүртэй);	0
	8702.90.13	Үйлдвэрлэснээс хойш нэг хүртэл жилийн насжилттай, шинэ троллейбус;	0
	8702.90.31	Нийтийн зорчигч тээврийн үйлчилгээний стандартын шаардлага хангасан, 24 буюу түүнээс дээш суудалтай, 45 буюу түүнээс дээш зорчигчийн багтаамжтай, үйлдвэрлэснээс хойш нэг хүртэл жилийн насжилттай, шинэ автобус (бензин, хийн түлшээр ажилладаг хөдөлгүүртэй)	0

“

2.Энэ тогтоолыг 2014 оны 01 дүгээр сарын 01-ний өдрөөс 2016 оны 12 дугаар сарын 31-ний өдөр хүртэлх хугацаанд дагаж мөрдсүгэй.

**МОНГОЛ УЛСЫН
ИХ ХУРЛЫН ДАРГА**

З.ЭНХБОЛД

**МОНГОЛ УЛСЫН ЕРӨНХИЙЛӨГЧИЙН ЗАРЛИГ**

2013 оны 05 дугаар
сарын 29-ний өдөр

Дугаар 83

Улаанбаатар
хот

**Шүүхийн Ёс зүйн хорооны
гишүүнээр томилох тухай**

Монгол Улсын Ерөнхийлөгчийн тухай хуулийн 9 дүгээр зүйлийн 1, Шүүхийн захиргааны тухай хуулийн 32 дугаар зүйлийн 32.4-т заасныг тус тус үндэслэн ЗАРЛИГ БОЛГОХ нь:

Норлоогийн Эрдэнэцогт, Дуламын Пунцаг, Нанжидын Чинбат, Хуягийн Номингэрэл, Оюунсайханы Алтангэрэл, Төмөрбаатарын Бат-Өлзий нарыг Шүүхийн Ёс зүйн хорооны гишүүнээр тус тус томилсугай.

**МОНГОЛ УЛСЫН
ЕРӨНХИЙЛӨГЧ**

Ц.ЭЛБЭГДОРЖ

МОНГОЛ УЛСЫН ЕРӨНХИЙЛӨГЧИЙН ЗАРЛИГ

2013 оны 06 дугаар
сарын 03-ны өдөр

Дугаар 86

Улаанбаатар
хот

**Элчин сайдыг тохоон
томилох тухай**

Монгол Улсын Үндсэн хуулийн гучин гуравдугаар зүйлийн 1 дэх хэсгийн 5, Монгол Улсын Ерөнхийлөгчийн тухай хуулийн 14 дүгээр зүйлийн 3, Дипломат албаны тухай хуулийн 16 дугаар зүйлийн 16.1 дэх хэсгийг тус тус үндэслэн ЗАРЛИГ БОЛГОХ нь:

Монгол Улсаас Бүгд Найрамдах Мозамбик Улсад суух Онц бөгөөд Бүрэн эрхт Элчин сайдаар Банзрагчийн Одонжилийг томилсугай.

**МОНГОЛ УЛСЫН
ЕРӨНХИЙЛӨГЧ**

Ц.ЭЛБЭГДОРЖ



МОНГОЛ УЛСЫН ЕРӨНХИЙЛӨГЧИЙН ЗАРЛИГ

2013 оны 06 дугаар
сарын 03-ны өдөр

Дугаар 87

Улаанбаатар
хот

Элчин сайдыг эгүүлэн татах, тохоон томилох тухай

Монгол Улсын Үндсэн хуулийн гучин гуравдугаар зүйлийн 1 дэх хэсгийн 5, Монгол Улсын Ерөнхийлөгчийн тухай хуулийн 14 дүгээр зүйлийн 3, Дипломат албаны тухай хуулийн 16 дугаар зүйлийн 16.1 дэх хэсгийг тус тус үндэслэн ЗАРЛИГ БОЛГОХ нь:

Монгол Улсаас Бүгд Найрамдах Ирланд Улсад суугаа Онц бөгөөд Бүрэн эрхт Элчин сайд Булгаагийн Алтангэрэлийг эгүүлэн татаж, Бүгд Найрамдах Ирланд Улсад суух Онц бөгөөд Бүрэн эрхт Элчин сайдаар Нархүүгийн Тулгыг томилсугай.

**МОНГОЛ УЛСЫН
ЕРӨНХИЙЛӨГЧ**

Ц.ЭЛБЭГДОРЖ

МОНГОЛ УЛСЫН ЗАСГИЙН ГАЗРЫН ТОГТООЛ

2013 оны 3 дугаар
сарын 16-ны өдөр

Дугаар 93

Улаанбаатар
хот

Журам батлах тухай

Амьтны тухай хуулийн 5.2.4, 7.6-д заасныг үндэслэн Монгол Улсын Засгийн газраас ТОГТООХ нь:

1. “Агнуур зохион байгуулалтын мэргэжлийн байгууллагын ажиллах журам”-ыг 1 дүгээр, “Ховор амьтныг агнах, барих тусгай зөвшөөрөл олгох журам”-ыг 2 дугаар хавсралт ёсоор тус тус баталсугай.

2. Журмын хэрэгжилтийг зохион байгуулж, биелэлтэд нь хяналт тавьж ажиллахыг Байгаль орчин, ногоон хөгжлийн сайд С.Оюун, аймгийн Засаг дарга нарт үүрэг болгосугай.

3. Энэ тогтоол гарсантай холбогдуулан “Журам батлах тухай” Засгийн газрын 2011 оны 10 дугаар сарын 12-ны өдрийн 291 дүгээр



тогтоол, “Жагсаалт, журам батлах тухай” Засгийн газрын 2012 оны 1 дүгээр сарын 11-ний өдрийн 7 дугаар тогтоолын 1 дүгээр зүйлийн ““Ховор амьтан агнах, барих зөвшөөрөл олгох журам”-ыг 2 дугаар” гэснийг болон 2 дугаар зүйлийг хүчингүй болсонд тооцсугай.

**МОНГОЛ УЛСЫН
ЕРӨНХИЙ САЙД**

Н.АЛТАНХУЯГ

**БАЙГАЛЬ ОРЧИН, НОГООН
ХӨГЖЛИЙН САЙД**

С.ОЮУН

Засгийн газрын 2013 оны 93 дугаар
тогтоолын 1 дүгээр хавсралт

**АГНУУР ЗОХИОН БАЙГУУЛАЛТЫН МЭРГЭЖЛИЙН
БАЙГУУЛЛАГЫН АЖИЛЛАХ ЖУРАМ**

Нэг. Нийтлэг үндэслэл

1.1. Аймаг, нийслэл, сум, дүүргийн болон агнуурын бүс нутгийн ан агнуурын менежментийн төлөвлөгөө боловсруулах, агнуур зохион байгуулалтыг гүйцэтгэх мэргэжлийн байгууллага (цаашид “мэргэжлийн байгууллага” гэх)-ын эрх, үүрэг, үйл ажиллагаатай холбогдсон харилцааг энэхүү журмаар зохицуулна.

1.2. Аймагийн Засаг дарга, тухайн орон нутгийн байгаль орчны асуудал хариуцсан байгууллага нь нутаг дэвсгэртээ ерөнхий агнуур зохион байгуулалт, менежментийн төлөвлөгөөг мэргэжлийн байгууллагаар хийлгэж аймаг, нийслэлийн иргэдийн Төлөөлөгчдийн Хурлын Тэргүүлэгчдээр хэлэлцүүлнэ.

1.3. Тухайн агнуурын бүс нутгийн менежментийг хариуцагч иргэн, хуулийн этгээд нь ан агнуурын менежментийн төлөвлөгөөг мэргэжлийн байгууллагаар хийлгэн сумын иргэдийн Төлөөлөгчдийн Хурлын Тэргүүлэгчдээр, сум дамжсан агнуурын бүс нутгийн агнуурын менежментийн төлөвлөгөөг аймгийн иргэдийн Төлөөлөгчдийн Хурлын Тэргүүлэгчдээр хэлэлцүүлнэ.

Хоёр. Агнуур зохион байгуулалтын төрөл

2.1. Агнуур зохион байгуулалтыг дараахь төрөлд ангилна:

2.1.1. ерөнхий агнуур зохион байгуулалт;



2.1.2. нарийвчилсан агнуур зохион байгуулалт.

2.2. Ерөнхий агнуур зохион байгуулалтыг аймгийн нутаг дэвсгэрт хийж, ан амьтны тархац нутаг, нөөц, агнуурын амьтны нас, хүйсний бүтэц, нөхөн үржлийн чадавхийг судалсны үндсэн дээр агнуурын бүс нутгийн хилийн зааг, хэмжээг тогтоож, ан агнуурын менежментийн төлөвлөгөөний төсөл боловсруулна.

2.3. Нарийвчилсан агнуур зохион байгуулалтыг иргэн, нөхөрлөл, хуулийн этгээдийн хариуцан хамгаалж байгаа агнуурын бүс нутагт хийж, ашиглаж болох агнуурын амьтны зүйл, агнуурын нөөцийг тогтоож, ан агнуурын менежментийн төлөвлөгөөний төсөл боловсруулна.

Гурав. Агнуур зохион байгуулалтын мэргэжлийн
байгууллагын үүрэг, хийж гүйцэтгэх
ажлын дараалал

3.1. Агнуур зохион байгуулалтын мэргэжлийн байгууллага нь дараахь үүрэг хүлээнэ:

3.1.1. агнуурын бүс нутгийн хэмжээ, хил хязгаарыг аймаг, сумын хэмжээнд тогтоох санал, үндэслэл боловсруулах;

3.1.2. агнуур зохион байгуулалтын ажил гүйцэтгэхэд шаардагдах мэдээ, баримтыг холбогдох мэдээллийн сангаас зохих журмын дагуу авч ашиглах;

3.1.3. өөрийн гүйцэтгэсэн агнуур зохион байгуулалтын ажлын тайлан, ан амьтны тархац, нэмэлт судалгааны дүнг гаргах;

3.1.4. батлагдсан ан агнуурын менежментийн төлөвлөгөөний хэрэгжилтэд хяналт тавьж, технологийн горим, техникийн шаардлага зөрчсөн тохиолдолд хариуцлага тооцох саналыг эрх бүхий байгууллага, албан тушаалтанд хүргэх;

3.1.5. агнуур зохион байгуулалтын ажилд дэвшилтэт технологи нэвтрүүлэх, хангамж, ажлын чанарыг сайжруулах арга хэмжээ авах;

3.1.6. агнуурын нөөцийг харгалзан тухайн агнуурын бүс нутагт ан амьтныг агнах, барихыг тодорхой хугацаагаар хориглох саналыг байгаль орчны асуудал хариуцсан төрийн захиргааны төв байгууллагад хүргэх.



3.2. Агнуур зохион байгуулалтын ажлыг дараахь үе шаттайгаар явуулна:

3.2.1. бэлтгэл ажил;

3.2.2. хээрийн хайгуул судалгаа;

3.2.3. хээрийн хайгуул судалгааны үр дүнг боловсруулах;

3.2.4. агнуур зохион байгуулалтын тайлан, дүгнэлт, ан агнуурын менежментийн төлөвлөгөөний төслийг хүлээлгэн өгөх.

3.3. Бэлтгэл ажлын хүрээнд дараахь үйл ажиллагаа явуулна:

3.3.1. агнуур зохион байгуулалт хийх газрын төлөв байдал, эзэмшил, ашиглалттай холбоотой мэдээлэл цуглуулах, өмнөх агнуур зохион байгуулалтын ажлын тайлан, зураглалтай танилцах, агнуур зохион байгуулалтын ажилд шаардагдах техник хэрэгслийг бэлтгэж шаардлагатай тэмдэглэгээ (гол, нуур, зам, агнуурын бүс нутгийн хил, өвөлжөө, хаваржаа, намаржаа, зуслангийн байршил, малын төрөл, тоо, эрүүл мэнд, өвчний байдал, геологийн хайгуулын болон ашиглалтын талбай, агнуурын санд нөлөөлж болох бусад хүчин зүйлсийн байршил г.м)-г газрын зурагт оруулах;

3.3.2. агнуур зохион байгуулалтын ажилд судалгааны нэгдсэн арга зүй хэрэглэх;

3.3.3. агнуур зохион байгуулалт хийлгүүлэх тухай захиалагчийн шийдвэрийн дагуу хэрэгжүүлэх ажлын хуваарь, хугацааг нарийвчлан гаргах;

3.3.4. ерөнхий агнуур зохион байгуулалтын ажилд 1:200.000-гаас 1:500.000 масштабтай байр зүйн зураг, нарийвчилсан агнуур зохион байгуулалтын ажилд 1:200.000 масштабтай байр зүйн зураг, 1:60.000-гаас багагүй нарийвчлалтай сансрын зураг ашиглах;

3.3.5. ерөнхий агнуур зохион байгуулалтын ажил хийх тохиолдолд тухайн зүйл амьтны тархац нутгийн 30-аас доошгүй хувьд, нарийвчилсан агнуур зохион байгуулалтын ажил хийх тохиолдолд 80-аас доошгүй хувьд нь сорилын талбайг сонгож авах;

3.3.6. агнуур зохион байгуулалт хийлгүүлэх захиалагчтай гэрээ байгуулах.



3.4. Хээрийн хайгуул судалгаа хийх ажлын хүрээнд дараахь үйл ажиллагаа явуулна:

3.4.1. хээрийн хайгуул судалгааны үед мөрдөх заавар, аргачлал, маягт, бусад баримт бичгийг бүрдүүлэх;

3.4.2. агнуурын бүс нутаг дахь ан амьтны зүйлийн бүрдэл, агнуурын үндсэн зүйлийн биологийн болон агнуурын нөөц, нөхөн үржлийн чадавхи, нас, хүйсний бүтэц, байршил, тархац нутаг, ашиглах тоо хэмжээг тогтоох;

3.4.3. ан амьтны агнуурын нөөцийг тогтооход тохиромжтой хугацаа сонгох;

3.4.4. агнуурын бүс нутгийн үнэлгээ хийхэд бэлчээр, идэш тэжээлийн нөөц, ургамал, нэгж талбай дахь ургамлын масс, идэш тэжээлийн өрсөлдөгч, дайсагнагч зүйлүүдийн элбэгшлийн байдлыг үнэлэх;

3.4.5. агнуурын бүс нутагт байрлах уурхай, дэд бүтэц, айл өрх, мал зэрэг агнуурын амьтны санд нөлөөлж байгаа хүчин зүйлийн нөлөөллийн цар хүрээ, нөлөөллийн хүчийг тодорхойлох мэдээллийг цуглуулах;

3.4.6. орон нутгийн мэргэжилтэн, байгаль хамгаалагч, байгаль орчны хяналтын улсын байцаагч болон иргэдээс ан амьтны байршил, нөөцөд нөлөөлөх хүчин зүйл, шилжилт хөдөлгөөн, ашиглалтын талаар мэдээ авах;

3.4.7. хөдөлмөр хамгаалал, аюулгүй ажиллагааны талаархи хууль тогтоомжийг чанд мөрдөх.

3.5. Хээрийн хайгуул судалгааны үр дүнг боловсруулах ажлын хүрээнд дараахь үйл ажиллагаа явуулна:

3.5.1. хээрийн хайгуул судалгааны явцад цуглуулсан мэдээ, мэдээллийг боловсруулан нэгтгэх. Ийнхүү нэгтгэхдээ дараахь аргачлалыг ашиглана:

1) агнуурын амьтны тархац нутгийн талбайг тогтоохдоо газар зүйн мэдээллийн программ хангамж, тэдгээрийн холбогдох өргөтгөлүүдийг ашиглах;

2) агнуурын хөхтөн амьтны эзэмшил нутгийг тогтоохдоо олон улсад хүлээн зөвшөөрөгдсөн орчин үеийн арга зүй, тооцооны программыг уламжлалт аргатай зөв хослуулан үндэсний



хэмжээнд нутагшуулах, хэрэглэх (агнуурын хөхтөн амьтны эзэмшил нутаг гэдэг нь тархац нутгийнхаа хүрээнд харьцангуй тогтвортой байршдаг газар нутгийг ойлгоно);

3) агнуурын амьтны биологийн нөөц болон агнуурын бүс нутгийг үнэлэхдээ олон улсад хүлээн зөвшөөрөгдсөн аргаас гадна эрдэм шинжилгээний байгууллагаар батлагдсан бусад арга зүйг ашиглах;

4) боловсруулалтад тусгай программ ашиглаж байгаа бол статистик тооцооны болон газар зүйн мэдээллийн программ хангамжтай харилцан зохицсон, мэдээг чөлөөтэй хөрвүүлэх боломжтой байх зарчим баримтлах;

5) амьтны зүйлүүдийн нас, хүйсийг тодорхойлохдоо өнгө зүс, биеийн болон эврийн хэлбэр зэрэг шинжүүдийг ашиглах.

3.5.2. агнуур зохион байгуулалтын эхлэл, төгсгөлийн хэлэлцүүлгийг оролцогч талуудыг хамруулан зохион байгуулж дараахь асуудлыг хэлэлцэнэ:

1) агнуур зохион байгуулалтын тайлан, дүгнэлт, агнуурын нөөцийг хамгаалах, тогтвортой ашиглах, өсгөн үржүүлэхтэй холбоотой арга хэмжээний төлөвлөгөө болон хэрэгжүүлэх арга хэлбэр, агнуурын амьтны тархацын болон нягтшилын зураг, ан агнуурын менежментийн төлөвлөгөөний төсөл;

2) агнуур зохион байгуулалттай холбоотой захиалагч, мэргэжлийн байгууллага болон бусад байгууллага, иргэдийн санал, хүсэлтийг хэлэлцэн тэмдэглэл хөтлөх.

3.6. Агнуур зохион байгуулалтын тайлан, дүгнэлт, ан агнуурын менежментийн төлөвлөгөөний төслийг захиалагчдад хүлээлгэн өгөх ажлын хүрээнд дараахь үйл ажиллагаа явуулна:

3.6.1. ерөнхий агнуур зохион байгуулалтын тайлан, дүгнэлт, ан агнуурын менежментийн төлөвлөгөөний төслийг аймгийн Засаг даргад хүлээлгэн өгөх;

3.6.2. агнуурын бүс нутгийн нарийвчилсан агнуур зохион байгуулалтын тайлан, дүгнэлт, ан агнуурын менежментийн төлөвлөгөөний төслийг захиалагч аж ахуйн нэгж, байгууллагын удирдлагад хүлээлгэн өгөх.

Засгийн газрын 2013 оны 93 дугаар
тогтоолын 2 дугаар хавсралт

ХОВОР АМЬТАН АГНАХ, БАРИХ ТУСГАЙ
ЗӨВШӨӨРӨЛ ОЛГОХ ЖУРАМ

Нэг. Нийтлэг үндэслэл

1.1. Энэхүү журмын зорилго нь ховор амьтан агнах, барих тусгай зөвшөөрөл олгохтой холбогдсон харилцааг зохицуулахад оршино.

1.2. Байгаль орчны асуудал хариуцсан төрийн захиргааны төв байгууллага (цаашид “төрийн захиргааны төв байгууллага” гэх) нь халдварт өвчний голомтыг тогтоох зорилгоор ховор амьтныг агнах, барих зөвшөөрлийг эрдэм шинжилгээний байгууллагын гаргасан дүгнэлтийг үндэслэн албан бичгээр, бусад тохиолдолд тусгай зөвшөөрлийн маягтаар олгоно.

1.3. Тусгай зөвшөөрлийн маягт, спорт агнуур болон олзворын агнуурын чиглэлээр амьтан агнах, барих гэрээний үлгэрчилсэн загварыг байгаль орчны асуудал эрхэлсэн Засгийн газрын гишүүн батална.

Хоёр. Энэхүү журамд хэрэглэсэн дараахь
нэр томъёог дор дурдсанаар ойлгоно

2.1. “Эрдэм, шинжилгээ” гэдэгт амьтны биеийн бүтцийг судлах, эд, эрхтэнд нь гэмтэл учруулалгүйгээр судалгааны багаж, тэмдэг зүүх, хэмжилт хийх, эд эрхтэнээс сорьц авахыг;

2.2. “Соёл, урлагийн зориулалт” гэдэгт үндэстэн, ястны уламжлалт зан үйл, музейн үзмэр, урлагийн бүтээл, амьтны хүрээлэн, соёлын үзвэрт ашиглахыг;

2.3. “Эмчилгээний зориулалт” гэдэгт эрүүл мэндийн асуудал хариуцсан төрийн захиргааны төв байгууллагын дүгнэлтийн дагуу эмийн үйлдвэрлэл, эмчилгээний зорилгоор гаршуулан үржүүлэх замаар ашиглахыг;



2.4. “Агнуурын бүс нутгийн менежментийг хариуцагч” гэж тухайн агнуурын бүс нутгийн ан агнуурын менежментийн төлөвлөгөөг хэрэгжүүлэхээр сумын Засаг дарга, аймаг, нийслэлийн байгаль орчны асуудал хариуцсан байгууллагатай Амьтны тухай хуулийн 22.5-д зааснаар эхний ээлжинд нэг жилийн хугацаатайгаар, цаашид арван жилийн давтамжтайгаар 30 хүртэл жилийн хугацаатай гэрээ байгуулсан иргэн, хуулийн этгээдийг;

2.5. “Зуучлагч байгууллага” гэдэгт спорт агнуур болон олзворын чиглэлийн агнуурыг анчдад зуучлах, үйлчилгээ үзүүлэх үйл ажиллагааг эрхэлдэг хуулийн этгээдийг.

Гурав. Судалгаа шинжилгээ, соёл, урлаг,
эмчилгээний зориулалтаар агнах,
барих тусгай зөвшөөрөл олгох

3.1. Байгаль орчныг хамгаалах тухай хуулийн 30 дугаар зүйлд заасан ан амьтны чиглэлийн мэргэжлийн байгууллага болон эрдэм шинжилгээний байгууллага нь ховор амьтныг судалгаа, шинжилгээ, соёл, урлаг, эмчилгээний зориулалтаар агнах, барих хүсэлтийг төрийн захиргааны төв байгууллагад бичгээр гаргана.

3.2. Ховор амьтныг судалгаа шинжилгээ, соёл, урлаг, эмчилгээний зориулалтаар агнах, барих хүсэлтэд амьтны зүйлийн нэр, тоо толгой, үндэслэл, агнах болон барих арга зүй, хугацаа, аймаг, сум, агнуурын бүс нутгийн нэрийг тодорхой заана.

3.3. Улсын тусгай хамгаалалттай газарт ховор амьтан барих тохиолдолд энэхүү журмын 3.2-т зааснаас гадна тухайн тусгай хамгаалалттай газрын хамгаалалтын захиргаатай байгуулсан гэрээг хавсаргана.

3.4. Төрийн захиргааны төв байгууллага нь зөвшөөрлийг олгохдоо холбогдох төрийн болон судалгаа, шинжилгээ, эрүүл мэнд, мал эмнэлэг, мэргэжлийн байгууллагын санал, дүгнэлт гаргуулж болно.



Дөрөв. Спорт агнуур болон олзворын чиглэлээр
ан амьтан агнах тусгай зөвшөөрөл олгох

4.1. Тухайн агнуурын бүс нутгийн менежментийг хариуцагч иргэн, хуулийн этгээд нь дараа онд тусгай зөвшөөрлөөр агнах амьтны тоо хэмжээний саналыг батлагдсан ан агнуурын менежментийн төлөвлөгөөнд үндэслэн жил бүрийн 8 дугаар сарын 1-нээс өмнө аймаг, нийслэлийн байгаль орчны асуудал хариуцсан байгууллагад хүргүүлнэ.

4.2. Аймаг, нийслэлийн байгаль орчны асуудал хариуцсан байгууллага нь энэхүү журмын 4.1-д заасан хүсэлт, аймгийн ан агнуурын менежментийн төлөвлөгөөнд үндэслэн дараа онд тусгай зөвшөөрлөөр агнах амьтны тоо хэмжээний саналыг аймгийн хэмжээнд нэгтгэн төрийн захиргааны төв байгууллагад жил бүрийн 8 дугаар сарын 20-ны дотор хүргүүлнэ.

4.3. Төрийн захиргааны төв байгууллага шаардлагатай гэж үзвэл ан амьтны тоо толгойн хяналтын үнэлгээг мэргэжлийн байгууллагаар тухайн агнуурын бүс нутгийн менежментийг хариуцагчийн хөрөнгөөр хийлгэж болно.

4.4. Төрийн захиргааны төв байгууллага аймаг, нийслэлийн байгаль орчны асуудал хариуцсан байгууллагын санал, аймгийн болон агнуурын бүс нутгийн батлагдсан ан агнуурын менежментийн төлөвлөгөө, энэхүү журмын 4.3-т заасан үнэлгээний дүгнэлтийг харгалзаж дараа онд тусгай зориулалтаар спорт болон олзворын чиглэлээр агнах, барих амьтны тоо хэмжээний саналыг жил бүрийн 10 дугаар сарын 15-ны дотор Засгийн газарт хүргүүлнэ.

4.5. Тусгай зориулалтаар агнах, барих амьтны тоо хэмжээг Засгийн газар баталснаас хойш ажлын 14 хоногт багтаан байгаль орчны асуудал эрхэлсэн Засгийн газрын гишүүн дараа онд тусгай зөвшөөрлөөр агнах, барих амьтны тоо толгойг агнуурын бүс нутгаар хуваарилан батална.

4.6. Энэхүү журмын 2.4-т заасан байгууллага нь сумын Засаг дарга, зуучлагч байгууллагатай гурвалсан гэрээ байгуулж, заасан хуваарийн дагуу ан амьтан агнах ажлыг зохион байгуулна.



4.7. Тухайн агнуурын бүс нутгийн менежментийг хариуцагч байгууллага нь гадаадын анчдад зуучлах үүргийг өөрөө хариуцан гүйцэтгэж байгаа тохиолдолд зөвхөн сумын Засаг даргатай гэрээ байгуулж болно.

4.8. Тухайн агнуурын бүс нутаг нь орон нутгийн тусгай хамгаалалттай газарт бүртгэгдсэн тохиолдолд энэхүү журмын 4.6, 4.7-д заасан гэрээг аймгийн Засаг даргаар батлуулна.

4.9. Төрийн захиргааны төв байгууллагын тухайн асуудлыг хариуцсан нэгж энэхүү журмын 4.6, 4.7-д заасан гэрээний эх хувь, агнуулах ангийн төлбөр, хураамжийг төлсөн санхүүгийн баримтыг үндэслэн тусгай зөвшөөрөл олгоно.

Тав. Спорт агнуур болон олзворын
чиглэлээр ан амьтан барих
тусгай зөвшөөрөл олгох

5.1. Амьтны тухай хуулийн 22.3-т заасны дагуу сум, дүүргийн иргэдийн Төлөөлөгчдийн Хурал өөрийн нутаг дэвсгэртээ нарийвчилсан агнуур зохион байгуулалтад үндэслэн спорт агнуурын зорилгоор загас, олзворын чиглэлээр ховор шувуу барих газрыг тогтооно. Загасчлах газар нь агнуурын ховор загасны амьдрах орчинтой давхардах эсэхийг шийдвэрт тодорхой тусгана.

5.2. Агнуурын ховор загасны амьдрах орчинд зөвхөн Амьтны тухай хуулийн 21.1.6-д заасан аргаар загасчилна.

5.3. Төрийн захиргааны төв байгууллага агнуурын ховор загас, шувуу барих тусгай зөвшөөрлийг тухайн сум, дүүргийн Засаг дарга, зуучлагч байгууллагатай хийсэн гэрээ, барих ангийн төлбөр, хураамжийг төлсөн баримтыг үндэслэн олгоно.

5.4. Агнуурын ховор загас барих нэг удаагийн тусгай зөвшөөрлийн хугацаа 14 хоног хүртэл байна. Агнуурын ховор загас барих тусгай зөвшөөрлийн төлбөрийг хүн/хоногоор тооцно.



Зургаа. Агнуурын бүс нутгийн менежментийг
хариуцагч байгууллагад тавигдах
шалгуур үзүүлэлт

6.1. Энэхүү журмын 2.4-т заасан байгууллага нь хариуцаж байгаа агнуурын бүс нутгийн нарийвчилсан агнуур зохион байгуулалтыг мэргэжлийн байгууллагаар хийлгэж, ан агнуурын менежментийн төлөвлөгөөг боловсруулж батлуулсан байна.

6.2. Ан агнуурын менежментийн төлөвлөгөөний хэрэгжилтийг аймаг, сумын Засаг даргатай хамтран дүгнэж, тайланг аймаг, нийслэлийн байгаль орчны асуудал хариуцсан байгууллагад жил бүр хүлээлгэн өгнө.

6.3. Зуучлагч байгууллагатай хийсэн ховор амьтан агнах, барих ажил үйлчилгээний гэрээний биелэлтийг хангана.

6.4. Агнуурын бүс нутгийн менежментийг хариуцагч байгууллага нь энэхүү журмын 4.6, 4.7-д заасан ховор амьтан агнах, барих гэрээний биелэлтийн тайланг аймаг, нийслэлийн байгаль орчны асуудал хариуцсан байгууллагад жил бүрийн 11 дүгээр сарын 15-наас өмнө хүргүүлнэ.

6.5. Байгалийн нөөц ашигласны төлбөрийн тухай хуулийн 18.1-д заасны дагуу тусгай зориулалтаар агнаж, барьсан ан амьтны төлбөрийн орлогын 50-иас доошгүй хувийг агнуурын бүс нутгийн ан агнуурын менежментийн төлөвлөгөөг хэрэгжүүлэхэд зарцуулна.

6.6. Агнуурын бүс нутагт тусгай зөвшөөрлөөр агнаж, барьсан ан амьтны төлбөрийн 50-иас доошгүй хувийг зөвхөн тухайн агнуурын бүс нутгийн ан агнуурын менежментийн төлөвлөгөөг хэрэгжүүлэхэд зарцуулна.

МОНГОЛ УЛСЫН ЗАСГИЙН ГАЗРЫН ТОГТООЛ

2013 оны 3 дугаар
сарын 22-ны өдөр

Дугаар 105

Улаанбаатар
хот

Журам шинэчлэн батлах тухай

Ойн тухай хуулийн 7.5-д заасныг үндэслэн Монгол Улсын Засгийн газраас ТОГТООХ нь:



1. “Ой зохион байгуулалт хийх журам”-ыг хавсралт ёсоор баталсугай.

2. Ой зохион байгуулалтын ажлын зардлыг жил бүр улс, орон нутгийн төсөвт тусган санхүүжүүлж, журмын хэрэгжилтийг хангаж ажиллахыг Байгаль орчин, ногоон хөгжлийн сайд С.Оюун, аймаг, нийслэлийн Засаг дарга нарт үүрэг болгосугай.

3. Энэ тогтоол гарсантай холбогдуулан “Журам батлах тухай” Засгийн газрын 2008 оны 3 дугаар сарын 5-ны өдрийн 85 дугаар тогтоолыг хүчингүй болсонд тооцсугай.

**МОНГОЛ УЛСЫН
ЕРӨНХИЙ САЙД**

Н.АЛТАНХУЯГ

**БАЙГАЛЬ ОРЧИН, НОГООН
ХӨГЖЛИЙН САЙД**

С.ОЮУН

Засгийн газрын 2013 оны 105 дугаар
тогтоолын хавсралт

ОЙ ЗОХИОН БАЙГУУЛАЛТ ХИЙХ ЖУРАМ

Нэг. Нийтлэг үндэслэл

1.1. Улс, аймаг, нийслэл, сум, дүүргийн болон ойн нөхөрлөл (цаашид “Нөхөрлөл” гэх), аж ахуйн нэгж, байгууллагын гэрээний дагуу эзэмшиж, ашиглаж байгаа ойн сангийн талбай, нөөц, төлөв байдал, өөрчлөлтийг тогтоох, ойн хомсдол доройтлоос үүдэлтэй хүлэмжийн хийн ялгаруулалт болон шингээлтийг тооцох, биомассын судалгаа хийх зорилгоор хийх ойн тооллого, ой зохион байгуулалтын ажилтай холбогдон үүсэх харилцааг энэхүү журмаар зохицуулна.

1.2. Ой зохион байгуулалтын ажил нь дараахь төрөлтэй байна:

1.2.1. улсын ойн санд хийх ойн тооллого;

1.2.2. эзэмшлийн ойн санд хийх ой зохион байгуулалт.



1.3. Ойн тооллого, ой зохион байгуулалтын ажлын гүйцэтгэгийг холбогдох хууль тогтоомжийн дагуу сонгон шалгаруулна.

1.4. Улс, аймаг, нийслэл, сум, дүүргийн газрын нэгдмэл сангийн тайлангийн ойн сан бүхий газрын мэдээллийг энэхүү журмын дагуу хийсэн ойн тооллогын тайлан, мэдээгээр тооцож оруулна.

1.5. Ойн тооллого, ой зохион байгуулалтын ажил гүйцэтгэх аргачлалыг байгаль орчны асуудал эрхэлсэн Засгийн газрын гишүүн батална.

Хоёр. Ойн тооллого

2.1. Ойн тооллогыг улс, аймаг, сумын түвшинд хийх бөгөөд үүнд дараахь үйл ажиллагааг хамруулна:

2.1.1. улсын ойн сангийн талбай, нөөц, таксацийн дундаж үзүүлэлт түүний өөрчлөлтийг гаргаж, ойн төлөв байдалд үнэлэлт өгөх;

2.1.2. ойн хомсдол доройтлоос үүдэлтэй хүлэмжийн хийн ялгаруулалт болон шингээлтийг тооцох;

2.1.3. ойн биомасс, бусад үзүүлэлтийг тодорхойлох;

2.1.4. ойн санг газрын болон ойн төрлөөр ангилсан зураг үйлдэх.

2.2. Ойн тооллогыг улсын ойн сангийн бүх талбайг хамруулан энэ журмын 1.5-д заасан аргачлалын дагуу гүйцэтгэнэ.

2.3. Ойн тооллогыг системчлэн байрлуулсан байнгын дээж талбайн хэмжилтэд тулгуурлан 5 жилийн эргэлттэйгээр явуулна.

2.4. Ойн сан бүхий бүх газрыг бүрэн хамарсан тогтмол хэмжээст тэгш өнцөгт координатын торлоор системчлэн байрлуулсан байнгын дээж талбайг байгуулах замаар ойн тооллогыг явуулна.

2.5. Ойн тооллогыг байгалийн гамшиг, ойн түймэр, хөнөөлт шавж, өвчний тархалтын улмаас ойд их хэмжээний хохирол учирсан тохиолдолд ойн сангийн өөрчлөлтийг тогтоох зорилгоор шаардлагатай аймаг,



нийслэл, сум, дүүргийн хэмжээнд энэхүү журмын 2.3-т заасан хугацаа харгалзалгүйгээр явуулж болно.

2.6. Ойн тооллогын ажилд суурь зураг нь 1:100000 масштабтай байр зүйн зураг байх бөгөөд өндөр болон хэт өндөр орон зайн шийд (30 м хүртэлх) бүхий хиймэл дагуулын мэдээ ашиглана.

Гурав. Ой зохион байгуулалт

3.1. Ой зохион байгуулалтын ажил тодорхой бүс нутагт болон нөхөрлөл, аж ахуйн нэгж, байгууллагын эзэмшиж, ашиглаж байгаа ойн санд хийгдэх бөгөөд үүнд дараахь үйл ажиллагааг хамруулна:

3.1.1. ойн санг хэсэглэлд хуваах;

3.1.2. ойн санг хэсэглэл бүрээр газрын болон модны төрлөөр ялгах;

3.1.3. ойд чанарын болон тоон үзүүлэлт (ойн таксаци)-ийн хэмжилтүүд хийх;

3.1.4. ойг хамгаалах, зохистой ашиглах, нөхөн сэргээх, ойн аж ахуйн арга хэмжээг тодорхойлох;

3.1.5. ойн санг газрын болон модны төрөл, ойн аж ахуйн арга хэмжээгээр ангилсан том масштабын төрөл бүрийн сэдэвчилсэн зураг үйлдэх.

3.2. Ой зохион байгуулалтын ажлаар ойн таксацийн үндсэн үзүүлэлт, ойн аж ахуйн арга хэмжээг ялгарал бүрээр тогтоох бөгөөд тайлан, зураг төсөл нь ойн менежментийн төлөвлөгөө боловсруулах үндэслэл болно.

3.3. Нөхөрлөл, аж ахуйн нэгж, байгууллага эзэмшиж, ашиглаж байгаа ойн сандаа хуульд заасан хугацаанд ой зохион байгуулалт хийлгэж баталгаажуулсан байна.

3.4. Ой зохион байгуулалтын ажлыг холбогдох хууль тогтоомжид нийцүүлэн үнэн зөв, чанартай хийх үүргийг гүйцэтгэгч мэргэжлийн байгууллага, түүний албан тушаалтан хүлээнэ.



3.5. Ой зохион байгуулалтын ажлын үед ойн хэсэглэлийн хилийн заагийг байгаль орчны асуудал хариуцсан төрийн захиргааны төв байгууллагын зөвшөөрөлгүйгээр өөрчлөхийг хориглоно.

Дөрөв. Ойн тооллого, ой зохион байгуулалтын
нийтлэг үйл ажиллагаа

4.1. Ойн тооллого, ой зохион байгуулалтын ажлыг бэлтгэл, хайгуул судалгаа, материал боловсруулалт, баталгаажуулалт гэсэн 4 үе шаттай явуулна.

4.2. Бэлтгэл ажлын хүрээнд:

4.2.1. ажил гүйцэтгэх газрын нөхцөл, эзэмшил, ашиглалттай холбоотой болон өмнө нь хийсэн судалгааны ажлуудын мэдээлэл, шаардагдах зураг, техник хэрэгслийг бэлтгэнэ;

4.2.2. ойн тооллого, ой зохион байгуулалтын ажил явуулах тухай төрийн захиргааны төв байгууллагын шийдвэрт заасны дагуу ажил гүйцэтгэх хугацаа, хуваарийг гаргана;

4.2.3. системчлэн байрлуулсан байнгын дээж талбайгаас тухайн жилд хэмжилт, судалгаа хийх түүвэр дээж талбайг сонгож байршлыг тогтооно;

4.2.4. ойн санг сум тус бүрээр 1000 га-с дээшгүй ойн талбайг хамарсан байхаар байгалийн үл хөдлөх тогтоцыг ашиглан хэсэглэлд хуваан дугаар олгоно;

4.2.5. хайгуул судалгааны ажилд хэрэглэх агаарын зураг болон хиймэл дагуулын мэдээнд анхан шатны боловсруулалт хийнэ;

4.2.6. гүйцэтгэгчийн санаачлагаар захиалагч, гүйцэтгэгчийн төлөөллийг оролцуулан техникийн 1 дүгээр зөвлөгөөн хийж хайгуул судалгааны ажлыг гүйцэтгэх арга, түүнд тавих хяналт, боловсруулан гаргах тайлан, зураг төслийн талаар харилцан зөвлөлдөж шийдвэр гаргана.

4.3. Хайгуул судалгааны ажлын хүрээнд:



4.3.1. ойн тооллогоор системчлэн байрлуулсан цэгүүдийн байршлыг тогтоон тэмдэгжүүлж, байнгын болон туслах дээж талбайнуудыг байгуулж хэмжилт судалгааны ажил гүйцэтгэнэ;

4.3.2. ой зохион байгуулалтын ажлаар ойн хэсэглэлийн хилийн заагийн уулзвар цэгийн газар зүйн байршлын солбицлыг тодорхойлох, тухайн газрын уул, нуруу, гол горхи, өндөрлөгүүдийн нэрийг тодруулах, тал газрын ойд хэсэглэлийн хилийн заагийн зураг авалт хийх зэрэг ажлыг гүйцэтгэнэ;

4.3.3. агаарын зураг болон хиймэл дагуулын мэдээг ашиглан шаардлагатай хэмжилт, тодруулалт хийнэ.

4.4. Материал боловсруулалтын ажлын хүрээнд:

4.4.1. хайгуул судалгааны ажлын явцад цуглуулсан мэдээ, мэдээлэл, өгөгдлүүдийг боловсруулан нэгтгэж, тайлан, зураглалын ажлыг гүйцэтгэнэ;

4.4.2. зураглалын ажилд Засгийн газрын 2009 оны 25 дугаар тогтоолд заасан солбицол, тусгагийг мөрдөнө;

4.4.3. ойн сангийн болон төрөл бүрийн сэдэвчилсэн зурагт хийх тэмдэг, тэмдэглэгээ, бичлэгийг ойн тооллого, ой зохион байгуулалтын ажил гүйцэтгэх аргачлалд заасан нэг хэв маягаар гүйцэтгэнэ;

4.4.4. материал боловсруулалтын ажил дуусмагц гүйцэтгэгчийн санаачлагаар захиалагч, гүйцэтгэгчийн төлөөллийг оролцуулсан техникийн 2 дугаар зөвлөгөөний хийж гаргасан тайлан, зураг төслийг хэлэлцэнэ.

4.5. Тайлан, зураг төслийн баталгаажуулалтын ажлын хүрээнд:

4.5.1. ойн тооллого, ой зохион байгуулалтын ажлын тайлан, зураг төслийг Ойн нөөцийн мэргэжлийн зөвлөл (цаашид “Зөвлөл” гэх)-өөр хэлэлцэж батална;

4.5.2. зөвлөл нь асуудлыг хуралдаанаараа хэлэлцүүлж хуралдааны тэмдэглэл, дүгнэлт, зөвлөмж гаргах бөгөөд эдгээр шийдвэрт дарга, нарийн бичгийн дарга гарын үсэг зурж баталгаажуулна;



4.5.3. ойн нөөцтэй холбоотой дор дурьдсан судалгааны тайлан мэдээг зөвлөл хэлэлцэж баталгаажуулна:

1) улсын төсөв болон олон улсын төсөл, хөтөлбөрийн хөрөнгөөр гүйцэтгэсэн ойн тооллого, ой зохион байгуулалтын ажлын тайлан, тооцоо, зураг төсөл, болон тэдгээртэй адилтгах бусад судалгаа шинжилгээний ажлын төсөл, үр дүнгийн тайлан, ажлын гүйцэтгэл;

2) улсын ойн сангийн талбай, нөөц, төлөв байдлын талаархи статистик мэдээлэл;

3) ойн нөөцийг ашиглах техник-эдийн засгийн үндэслэл, төсөл, нөхөн сэргээх ажлын тайлан, үр дүн;

4) таримал ойг улсын ойн санд бүртгэх асуудал.

4.5.4. зөвлөл нь дарга, нарийн бичгийн дарга, гишүүдээс бүрдэх бөгөөд бүрэлдэхүүнийг байгаль орчны асуудал эрхэлсэн Засгийн газрын гишүүн батална.

Тав. Хяналт-шинжилгээ

5.1. Ойн тооллого, ой зохион байгуулалтын ажлын гүйцэтгэлд “Ойн судалгаа, хөгжлийн төв” улсын төсөвт үйлдвэрийн газар хяналт-шинжилгээ хийнэ. Шаардлагатай тохиолдолд төрийн бус байгууллагаар хөндлөнгийн хяналт хийлгэж болно.

5.2. “Ойн судалгаа, хөгжлийн төв” нь энэхүү журмын 4.5.3-т заасан судалгаа шинжилгээний ажлын тайлан, тооцоо, зураг төслийг хянаж, дүгнэлт гарган зөвлөлд хүргүүлнэ.

Зургаа. Хадгалалт, хамгаалалт

6.1. Ойн тооллого, ой зохион байгуулалтын ажлын тайлан, зураг төслийн эх хувийг хадгалах, хамгаалах архив бүрдүүлэх асуудлыг “Ойн судалгаа, хөгжлийн төв” хариуцана.

6.2. Ойн тооллого, ой зохион байгуулалт хийсэн мэргэжлийн байгууллага нь энэхүү ажлын тайлан, зураг төслийн нэг хувийг байгаль орчны асуудал хариуцсан төрийн захиргааны төв байгууллагад шилжүүлэн өгөх үүрэгтэй.



6.3. Гүйцэтгэгч өөрийн гүйцэтгэсэн ойн тооллого, ой зохион байгуулалтын ажлын тайлан, зураг төслийг иргэн, нөхөрлөл, аж ахуйн нэгж, байгууллагын хүсэлтээр төлбөртэйгээр хуулбарлан өгч болно.

Долоо. Санхүүжилт

7.1. Ойн тооллого, ой зохион байгуулалтын ажлыг Ойн тухай хуулийн 7.4-т заасан эх үүсвэрээс санхүүжүүлнэ.

Хаяг:

“Төрийн мэдээлэл” эмхэтгэлийн редакци.
Улаанбаатар-14201, Төрийн ордон 124 тоот
И-мэйл: turiin_medeel@parliament.mn

Утас: 262420

Хэвлэлийн хуудас: 1.5

Индекс: 14003